

Nivaap imartaata itisilernissaanut 2023-mi misissueqqissaarnissamut Naalakkersuisut peqquneqarnissaannik Inatsisartut aalajangiiffingisassaattut siunnersuut.

(Inatsisartunut Ilaasortaq Kristian Jeremiassen, Inuit Ataqatigiit)

Akissuteqaat

(Ineqarnermut Attaveqaasersuutinullu Naalakkersuisoq)

Siullermeerneqarnera

Inatsisartunut ilaasortap Kristian Jeremiassenip, Inuit Ataqatigiit, aalajangiiffingisassatut siunnersuutaanut Naalakkersuisut qujapput. Innuttaasunut imaani isumannaatsuutitsinissaq ukkatarineqarmat Naalakkersuisut nuannaarutigaa.

Ikerasaat pillugit apeqqutit ukiut ingerlanerini Inatsisartuni qaqinneqartarnerisigut, ilaatigut ikerasaat pillugit nalunaarusiortoqassasoq aalajangerneqarpoq. Kommunit tapersiissuteqarnerisigut ikerasaat pillugit nalunaarusiaq suliarineqarpoq, taamaattumillu ikerasaat pillugit suliaqartussaattilluta sakkussaalluarluni. Inatsisartunut agguanneqarnikuvoq, kingornalu katersuunnerni arlaqartuni ikerasaliornissamut tunngasunik apeqquteqartoqarnikuulluni.

Ikerasaat pillugit nalunaarusiap kingorna ikerasammut soqutiginninneq annertusiartortoq eqqarsaatigissagaanni, ikerasaat pillugit eqqartuinerit pingaaruteqartutut isigineqarsinnaapput. Taamaattumik tamanna pillugu Inatsisartuni eqqartuinissatsinnut siunnersuuteqartup periarfissimmatigut qujavunga.

Imarsiornermut tunngatillugu attaveqaasersuutit pisariaqartinneqartut pigineqarnissaannik qulakkeerisariaqarnitsinnut Naalakkersuisut isumaqataalluinnarput. Imarsiornermut tunngatillugu attaveqaasersuutit pineqartillugit umiarsualiviit, naaralaartitsiviit, imarsiortunut nalunaaqutsiussat ikerasaallu pineqartarput, attaveqaasersuutinilu suna pingaartinneqassanersoq isummertoqartartussaalluni.

Pingaartumik Namminersorlutik Oqartussat umiarsualiviutaat inuussutissarsiutilinnut, inuiaqatigiinnilu pilersuinerup isumannaatsuutinneqarnissaanut pingaaruteqarput. Taamaattumik akisussaaffiup tamassumap pimoorunneqarnissaa pingaaruteqarluinnarpoq.

Taamaakkaluartoq ikerasaat, itisiliinernillu suliaqarneq kommunit imaluunniit Namminersorlutik Oqartussat susassaqarfigineraat suli erseqqissarneqarnikuunnigilaq. Tamanna pillugu kommunit aningaasaleeqataasinnaanissaannut, tulleriaarinernullu tunngatillugu ersarissumik paasinnittoqarsinnaaniassammat, kommunit pineqartut peqatigalugit ikerasaat eqqartorneqassasut Naalakkersuisut kissaatigaa.

Tamanna tunuliaqutigalugu tullituttoq allannguutissatut siunnersuutigineqarpoq:

”Nivaami ikerasak suliarineqarnissaa immikkut ittumik ukkataralugu imarsiornermut tunngatillugu attaveqaasersuutit pitsanngorsarnissaat pillugu Kommune Qeqertaliup tulleriarineranik, matumani kommunip aningaasaleeqataanissaanut periarfissai ilanngullugit, Naalakkersuisut Kommune Qeqertalimmut saaffiginnissuteqarnissaannik peqquneqarnissaannik Inatsisartut aalajangiiffisassaattut siunnersuut.”